

Ilinniartitaanermut inuussutissarsiutinillu siunnersuisarneq pillugu Inatsisartut inatsisaata allanngortinneqarnera pillugu Inatsisartut inatsisaat (Nuna tamakkerlugu ilitersuisarnermi iliuusissanik periusissiornerup ilanngunneqarnera aamma naammassinninnissamut ikaarsaariarnissamullu siunnersuinermit piumasaqaatip ikkunneqarnera)

§ 1

Kalaallit Nunaanni ilinniartitaanermut inuussutissarsiutinillu siunnersuisarneq pillugu Inatsisartut inatsisaanni nr. 4, 29. november 2013-imeersumi, Inatsisartut inatsisaatigut nr. 12, 27. november 2018-imeersukkut allanngortinneqartumi, imatut allannguisoqarpoq:

1. § 3-mi nr. 9-p kingorna normutut nutaatut ilanngunneqassaaq:

”10) nuna tamakkerlugu ilitersuinissamut periusissiornerup ingerlaavartumik nutarterneqartarnissaa,”

2. § 10 imatut oqaasertalerneqassaaq:

" § 10. Ilinniartit ilinniagaqarniarlutik qinnuteqartunut ilinniakkamik naammassinninnissamut ikaarsaariarnermilu ilitersuisarnissamut akisussaapput. Ilinniakkanut pineqartunut malittarisassat atuuttut malillugit ilitersuineq ingerlanneqassaaq, taamaattoorli tak. imm. 2-4.

Imm. 2. Ilinniartit naammassinninnissamut ilitersuinerat ilinniagaqartup ilisimasaanik, pikkorissusianik ilinniakkamilu piginnaasaanik ikorfartuillunilu ineriartortitsissaaq. Tassunga ilaapput inummut inooqataanermullu pissutsit, ilinniartitaanermi atuartitsissutinik qaffasissutsinillu toqqaaneq, takkutinngitsoorneq, kajumissuseq, karakterit, soraarummeernermi periuseq, soraarummeernissamut annilaanganeq, ilinniariaaseq, sulinermi ileqqut, suleqatigiissinnaassuseq aamma ilinniakkami atuaqatigiinnilu atugarissaarneq pillugu ilitersuineq. Naammassinnissinnaanermut ilitersuineq siusissukkut pitsaaliuilluni suliniutitut tunniunneqassaaq ilinniagaqartup ilinniarnernup annertuumik artukkiisutut misigisaqannginnissaa atuartitsinermullu naleqqiullugu katataannginnissaa qulakkeerniarlugu.

Imm. 3. Ilinniartit ikaarsaariarnermi ilitersuinerisa qulakkiissavaat ilinniartut ilisimatinneqarneq, eqqarsarfusumik piviusorsioortumillu tunngaveqarlutik ilinniakkamik, inuussutissarsiummi aamma atorfimmi ingerlavissamik toqqaasinnaallutik. Tassunga ilaapput piginnaasat soqutigisallu

paasisaqarfigineri, ilinniakkap imarisaanut, piumasaaqataanut, naatsorsuutigisanut, ingerlaqqinnissamut periarfissanut, ilinniartitsinermut, kulturimut avatangiisinut suliffeqarfinnillu ilisimasaqalernissap qulakkeerneqarnera.

Imm. 4. Naalakkersuisunit akuerisaasumik ilinniartitsinermik inuussutissarsiutinullu siunnersuisarnermik ilinniagaqarsimasunit imaluunniit tassunga assingusumik ilitersuisinnaanermik piginnaasaqarnermik uppernarsaasinnaasunit inunnit naammassinninnissamut ikaarsaariarnermilu ilitersuineq ingerlanneqassaaq. Naalakkersuisut tamanna pillugu ilinniarfinniit qinnuteqartoqareernerata kingorna ilitersuisarnerup inummit siunnersuisarnermi allaanerusunik piginnaasaqartumit utaqqiisaasumik ingerlanneqarnissaa akuerisinnaavaat, ilitersuisartoq pineqartoq Naalakkersuisunit akuerisaasumik ilinniartitsinermik siunnersuisarnermillu ilinniarnermik ingerlataqarpat ilinniarnissamilluunniit pilersaaruteqarpat."

3. § 13 ima oqaasertaqassaaq:

" § 13. Iltersuinikkut suliniutinik aqutsinermut aamma ilinniartitaanermut suliffeqarnermullu tunngatillugu anguniakkanut naleqqiullugu suliniutit siunnerflernissaannut atugassanik nuna tamakkerlugu paasissutissanut tunngavinnik pilersitsinissaq siunertaralugu ataasiakkaanut ilitersuinerni suliniutitik pillugit aamma innuttaasut ilinniartitaanikkut suliffeqarnikkullu killiffi pillugit paasissutissat kommunalbestyrelsinit ilinniarfinniillu nalunaarsorneqarlutillu Naalakkersuisunit nalunaarutigisassavaat.

Imm. 2. Imm. 1-imi siunertarisatut taaneqartut innersuussutigalugit, kommunalbestyrelsit, ilinniarfiit, meeqqat atuarfiit namminersortut, efterskolit folkehøjskolellu ilinniarfiup ilitersuisoqarnikkut suliai pillugit paasissutissanik nalunaaruteqaqqullugit Naalakkersuisut peqqusisinnaapput.

Imm. 3. Imm. 1 aamma 2 naapertorlugit nalunaarsuisarneq paasissutissanillu nalunaaruteqartarneq pillugit Naalakkersuisut malittarisassanik aalajangersaasinnaapput, tassunga ilanngullugu paasissutissat elektroniskimik nalunaarsorsimanissaannik nalunaarutigineqarnissaannillu piumasaaqarsinnaaneq pillugu."

§ 2

Inatsisartut inatsisaat ulloq 1. januar 2022-mi atuutilissaaq.

Imm. 2. Inatsisartut inatsisaanni § 1, nr. 2-mi § 10, imm. 4, 1. januar 2022 sioqqullugu ilitersuisarnermik suliaqartutut taaneqartuni inunnut atorfeqartunut atorneqassanngilaq.

Namminersorlutik Oqartussat, ulloq 1. december 2021

Múte Bourup Egede
Naalakkersuisut Siulittaasuut

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut